

Trusopplæringspris til lokale eldsjeler

Eldsjeler står for mykje spennande i trusopplæringa.



Trusopplæringspris til lokale eldsjeler

Tekst og bilete: Steinar Skartland

Det vart ei flott gudsteneste med fleire overraskningar i Skjold, søndag 26. november. Utan at det var kjent på førehand tok Berit Listog, leiar i FUT, over og kunn gjorde at dei nå skulle dela ut Trusopplæringsprisen til leiarane for Familiespeidninga i Skjold og Vikebygd: Lars Henry Dagsland, Karianne Dagsland, Iselin Tveit og Håvard Tveit

– I Vindafjord finst eit «Felles Utval for Trusopplæring» (FUT) og der samlast representantar for bygdene eller sokneråda våre for å ha fokus på, og omsorg for, trusopplæringsarbeidet i bygdene våre, innleia Berit Listog med.

– Både det som trusopplærarane: Esther, Berit og Britt står for, men og for det frivillige arbeidet som føregår rundt omkring i bygdene våre. Kvart år blir sokneråda utfordra på å koma med kandidatar til trusopplæringsprisen, der dei bevisst ser folk som på ein særleg måte har vist kjærleik til, og omsorg for, det frivillige arbeidet. Med trufastheit, kreativitet og tidsbruk som dei legg ned i det. Det kjem inn mange kandidatforslag og FUT prøver også å fordela prisane på bygdene. I år er det nokon i Skjold og Vikebygd som skal få prisen, sa ho.

Esther Åsheim tok over og las opp grunngjevinga for prisen dette året:
– Årets trusopplæringspris går til personar som betyr mykje for det levande arbeidet som føregår i bygdene våre. Dei har i mange år vore engasjerte som par, ektefelle og foreldre. Om det ikkje er dei som stikk seg mest fram i folkemengdene, så er det likevel dei som får ting til å gå rundt og opplegg til å bli gjennomført. Det ligg mange planleggingstimar, samtalar og avtalar om møte bak arbeidet som dei gjer. De som har desse i bygdene dokkars, skal vera stolte og takknemlege for at dei bur akkurat i di bygd. Dei gjer ditt nærmiljø og di bygd til noko spennande for store og små. Arbeidet deira samlar folk i alle aldrar og det gjev mange positive opplevelingar.



Trusopplæringsprisen tildelt eldsjelene innan familiespeidninga.
F.v.: Lars Henry Dagsland, Karianne Dagsland, Iselin Tveit og Håvard Tveit.

Dette er med og skaper ein følelse av samhald mellom generasjonane. Det gjer dette opplegget unikt. Tiltaket er inkluderande og det femner breitt. Det oppmuntrar mange i bygdene til å delta. Det når langt ut med trusopplæring med den måten dei driv arbeidet på. Desse personane har verkeleg fått det til. Nokre vil òg seia at arbeidet dei gjer er eit nybrotsarbeid, og dei som har halde på med nybrotsarbeid veit kor krevjande det kan vera. Ein går ikkje inn i ferdige planar og opplegg. Ein lyt definera, tenkja saman og laga felles visjonar for alt arbeidet. Men dette har dei klart. Med stå-på-vilje, med samarbeid, med å gje og ta. Og arbeidet er eit flott trusopplæringsstiltak som ikkje berre femner breitt i alder, men òg får bygdene til å møtast. Veit dei sjølve kor flott arbeid dei er med på å skapa? Det er ikkje sikkert, men alle som har vore med i Familiespeiding i Skjold og Vikebygd har fått oppleva dette.

Årets trusopplæringspris 2023 gjekk til Håvard Tveit, Iselin Tveit, Karianne Dagsland og Lars Henry Dagsland.
– Tusen takk for det flotte arbeidet som de gjer i Familiespeidninga.



Kyrkjelydspedagog Esther L Åsheim las opp grunngjevinga for prisen.

Kateket Britt Karstensen hadde kjøpt inn «figurar» med tittelen «Glede». Det går på å synga, le, dansa og skapa. Kvar av para fekk ein slik figur i tillegg til blomar og ein diplom som synleg bevis på pristildelinga.

Mykje spennande i trusopplæringa i denne våren.

Av Ester Limstrand Åsheim,
kyrkjelydpedagog

Etter ein fantastisk spennande haust som kyrkjelydpedagogar og kateket står me klar til å famne ein ny vår med mykje kjekt opplegg. Denne våren har me ikkje trusopplærarar, berre kyrkjelydpedagog og kateket.

5.klassingar var på leir allereie no i januar.

Konfirmantane våre skal på leir i februar. Dei er så stort kull i kommunen dette konfirmantåret, at det måtte setjast opp to leiarar og gruppa måtte delast. Hadde konfirmantane fått velje hadde det nok vore felles i ei stor gruppe med eit herleg kaos. Me vaksne tok til fornuft og fann ut det var lurt å dele dei opp litt.

1.klassingar i heile kommunen skal få vere med på skattejakt denne våren. Dei skal få bli meir kjende i si lokale kyrkje. Her blir det leit etter ting i kyrkja, formingsaktiviteter, song og forteljingar frå bibelen.

2.klassingar skal få vere med på brubyggjar som har tema pinse. På desse samlingane bruker me ein del Lego. Me byggjer bru, har formingsaktivitetar og får høyre historia til Peter som fortel om pinsen.

7.klassingar i heile kommunen blir inviterte på opplegget «Høgt og lågt med Gud». Våren 2023 var første gong dette var gjennomført og me var då i klatreparken på Nedstrand. Her var det klatring, postar og mat. Mykje mat. Me kryssar fingrar for at dette let seg gjennomføre i år og. Me som trusopplærarar har lagt det inn i planen vår.

8.klassingar får i slutten av vårhalvåret være med «På val». Ein kveld



Utdeling 4-årsbok i Vikedal kyrkje 2022 foto Andreas Andreassen.

der dei blir presentert for konfirmasjon, kva som skjer i konfirmantåret og om dei vel å vere med på dette. Ein kveld for både foreldre og ungdommar.

Babysong startar nytt kurs i løpet av våren og har samlingar fast ein gong i veka, 10 gonger. Her møter ein opp og syng saman. Me syng nye songar og gamle, kjære og kjende songer. Det er lunsj og samling etterpå. Mange foreldre synes dette er ein god sosial møteplass midt i kvardag og bleieskift.

3-5 åringar i Vikedal og Imsland får i januar/februar bli med på «Supersong på bedehuset» i Vikedal. Der syng me, spelar rytmeinstrument, dansar og leikar. Alle er med i leiken, både ungane og dei vaksne.

Barnehagane får òg invitasjon i løpet av våren. Det første dei blir invitert inn på er påskevandring. Barnehagane kjem, og me tek vandringa frå palmesøndag fram til Jesu oppstode. Ei ganske intens historie. Då er det godt å ha kyrkjelydpedagogar og kateket med pedagogisk utdanning som klarar å formidle historia på ein forståeleg måte for borna og møte dei i undringa undervegs. Pinsefest er òg noko barnehagane får bli med på. Dette er og ei



4 åringar i Skjold kyrkje januar 2022 tenning av lys i lysgloben. foto Britt Karstensen.

historie som kan være utfordrande for enkelte vaksne å formidle. Men kyrkjelydpedagogar og trusopplærarar og kateket brukar kontratar og dramatisering når dei reiser gjennom historia om pinsen. Her er det full feiring av kyrkja sin bursdag. Glede og fargar.

Slik går våren før me plutsleig er på hausten igjen med 3.klassingar på gardsbesøk, 4-åringar som skal få 4-årsbok, tumlande 2-åringar og mykje meir. Du og du så spennande det er å arbeide med trusopplæring i Vindafjord!

Andaktstelefonen
380 91 700
Åpent hele døgnet!
Ny andakt tirsdag og fredag
Tjenesten er gratis

**Korleis har du det...
EIGENTLEG?**
Eit menneske å snakke med når livet er som verst
SOS-Chat: www.soschat.no
SOS-melding: www.kirkens-sos.no

Neste nummer av Hyrdingen kjem ut 21.mars
Frist for levering av stoff er 21.februar